

ILUARSIISSUT

Aalajangiiffisassatut siunnersuut 10. marts 2023-mik ullulerneqarsimasoq taarserpaa

(Siunnersuuteqartumik allanguineq)

Nunat Avannarliit Killiit Siunnersuisoqatigiiffiannut aallartitat siulittaasuata Inatsisartut Suleriaasianni § 33, imm. 3, nr. 1 malillugu aalajangiiffisassatut siunnersuut tulliuuttoq saqqummiuppaa:

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 1/2022-imi Inatsisartut ilaliinissaannik siunnersuut:

Nunat Avannarliit Killiit Siunnersuisoqatigiiffiata Islandimi, Kalaallit Nunaanni Savalimmiunilu suleqatigiinnermut naalakkersuisunut kaammattuutigaa Nunat Avannarliit Killiit aalajangersakkatut kaammattuutaanik nunat malitseqartitsisarnerat pillugu suleqatigiinnermut naalakkersuisut ukiumoortumik nassuiaateqartarnerat siusarsaqqullugu Nunat Avannarliit Killiit Siunnersuisoqatigiiffiannut ataatsimut allakkatigut nassuiaateqartarnermut suleqatigiinnermut naalakkersuisut paarlakaajaallutik aqutsisuusarnerisigut.

(Aallartitat siulittaasuata Doris J. Jensen)

Tungavilersuut:

Kaammattuutitut aalajangersagaq nr. 1/2022 akuersissutigineqarpoq ilaasortap siunnersuutaanut allanguutissatut siunnersuummik Nunat Avannarliit Killiit Siunnersuisoqatigiiffiata Siulittaasoqarfiata saqqummiussereerneratigut.

Siunnersuutaaqqaartumi siunnersuutigineqaraluarpoq Nunat Avannarliit Killiit Siunnersuisoqatigiiffiata Islandimi, Kalaallit Nunaanni Savalimmiunilu naalakkersuisunut kaammattuutigissagaa NORA-mik (nunat atlantikap avannaanut sineriiallit suleqatigiiffiat) suleqatigiinnissamik isumaqatigiisummik isumatigiinniuteqarlutillu atsiugaqassasut 2023-miillu nunat avannarliit killiit suleqatigiinneranni suliniutinik aalajangiinernillu nunani avannarlerni killerne naalakkersuisut malitseqartitsisarnerannik ataqatigiissaarinermik, nalilersuisarnermik malitseqartitsinermillu NORA-p suliaqarsinnaanissaannut aningaasaliissuteqartoqarluni.

Siulittaasoqarfiup innersuussutigaa siunnersuut nunani avannarlerni killerni naalakkersuisut aamma Nunat Avannarliit Killiit Siunnersuisoqatigiiffiata suleqatigiinnissamik nalunaarutaanni 2002-meersumi immikkoortumut 4-mut tungammat, tassani oqaatigineqarluni suleqatigiinneq ilaatigut ingerlanneqassasoq Siunnersuisoqatigiiffiup kaammattuutitut aalajangersagaasa nunanit malitseqartinneqartarnerat nunallu suleqatigiinnerat pillugu suleqatigiinnissamut naalakkersuisut ukiumoortumik nassuiaateqartarnerisigut.

Siulittaasoqarfik isumaqarpoq Nunat Avannarliit Killiit Siunnersuisoqatigiiffiat taama sukumiitigusumik Nunat Avannarliit Killiit Siunnersuisoqatigiiffiata kaammattuutitut aalajangersagaasa

malitseqartinneqarnissaannut aqqutissanik sunik naalakkersuisut toqqaanersut akuleruffigisariaqanngikkaat, tamanna naalakkersuisut nammineq susassaqarfigimmassuk, soorlu aamma Siulittaasoqarfik isumaqartoq siunnersuisoqatigiiffiup kaammattuutit aalajangersagaasa pileriertortarnerinut qulequttanut suleriaatsinulluunniit naalakkersuisut akuliuttussaangitsut.

Peqatigitillugu Siulittaasoqarfik isumaqarpoq siunnersuisoqatigiiffiup kaammattuutit aalajangersagaanik malitseqartitsisarneq pillugu Nunat Avannarliit Killiit Siunnersuisoqatigiiffiannit naalakkersuisunut qulliunerusumik kaammattuuteqarneq pilersaarusionerqarlunilu suleqatigiinnissamik nalunaarummi immikkoortumi 4-mi killililiussanut innersuussutigineqartariaqartoq, taamaalilluni suleqatigiinnissamik nalunaarut eqqarsaatigalugu susassaqartup avataaneersup, tassa NORA-p, peqataasinneqarnissaa kaammattuuteqarnermi innersuussutigineqassanani.

Taamaattumik Siulittaasoqarfiup siunnersuutigaa Nunat Avannarliit Killiit Siunnersuisoqatigiiffiata kaammattuutit aalajangersagaq nr. 1/2022 akuersissutigissagaat imatut allanngortillugu Nunat Avannarliit Killiit Siunnersuisoqatigiiffiata naalakkersuisut siunnersuisoqatigiiffiullu akornanni suleqatigiinnissamik nalunaarummut killililiussat iluanni siunnersuisoqatigiiffiup kaammattuutit aalajangersagaasa malitseqartinneqartarnerat pillugu nunani avannarli killerni naalakkersuisunut kaammattuuteqarnikkut.